





高  
四三  
中原五子類相從餘者碌碌若沙蟲佩九畹蘭扈營薊  
雲夢八九吞其胃如椽之筆手罄控片言隻字成赧虹  
列羅今古棟宇充繁然江妃漢女容矯然黃鶴摩蒼穹  
黑髮黃龍然園魏飄英隸駘駘米黠黠隋珠荆璧世少雙  
乘奔白雲然園魏飄英隸駘駘米黠黠隋珠荆璧世少雙  
翼五鳳已外吳斯文以盡余南嶽共余文命文主芙蓉  
平如開帝帝夫願隨隨同中十餘字宜苦文曹中辭  
盡賞軒輿宗宗莫莫姑與請門同若蕙天門窺式意

大泌山房集卷之九十三

京山李維楨本寧著

雲南按察司副使孫公嚴宜人墓志銘

明興家世擅雕龍之慶者在楚有華容孫氏為洞庭漁  
人宜山人斯億斯億弟博士斯傳與其子吉士羽侯海  
內籍籍誦之而有開必先則觀察石磯公也石磯公諱  
繼芳世其其字父榮領成化癸卯鄉薦歷信陽州守遷  
同知處州府以循吏稱娶劉宜人是為忠宣公妹公兒  
時穎敏日誦千言善屬舉子業父守信陽遣從何舍人  
仲默學年二十四舉於鄉遊太學師呂仲木故其治經



明  
術爲古文辭精詣不羣性直質好善聞人善若已有之  
譽不容口見人不善或有不平嫉之多犯避諱不顧而  
好藏書特甚傾其橐與嚴宜人簪珥購善本寒以之衣  
饑以之食朝夕忘疲也舉進士授刑部山西司主事是  
時閹瑾干政掌東廠者藉其權勢甚張誣平民若干人  
爲盜公知其寃以白尚書尚書虞失東廠歡公抗言官  
自我得自我失耳殺人媚人有死不能尚書從其議報  
東廠東廠無以難公卒出若干人御史張璞劉天和王  
廷相坐忤諸閹下獄璞死二公長繫未幾乾清宮災詔  
求直言公上疏救格不行二公咸謫去而公亦謝病歸

歸二載起爲兵部車駕主事遷職方司員外郎奉使經  
略哈密貢夷有措置機宜至今傳之

毅皇帝南巡與同舍郎諸部寺屬百餘人伏闕諫  
上怒廷杖之武庫郎陸震死焉爲經紀其喪遷車駕郎  
中明年爲會試同考試官所舉皆民譽也已改職方會  
毅皇帝崩嬖人江彬擁諸邊卒數千狼子野心中外憂  
之公與執政密計召安邊伯許泰率禁兵守諸門遣邊  
卒就伍二日彬伏誅

肅皇帝卽位詔汰諸武官及卒冗者事多出公畫彭公  
澤爲尚書奇其材一切埤益之簿領山積咄嗟而辦四



方言利害者章滿公車一覽不忘屬奏草命掾史執筆  
左右侍口占授之明習文法練國制度審畫邊事萬里  
如指掌南海霍大宰故爲同舍郎疏議追尊

獻皇帝約署名公曰吾不敢掠美謝之邊將感恩者以  
金置茗裏餽茗窮而金見趣呼追還之自公退食杜門  
手一編不輟嚴宜人治蔬糲以進其甘如饗大牢而攜  
兩家僮自隨使爲人櫛髮爲買一驢長安道上取往來  
者雇直供薪水而已癸未部試武士故事屬職方郎提  
調右侍郎某者貪而昵主事某某相公姻也居  
署中好稱說某相公同舍亦以相公故謹事之公獨數

面斥其過主事與侍郎謀易諸執事官名次公因自署  
其事監箭以他郎提調示不與某同也諸郎咸共譏刺  
之語侵侍郎侍郎嘗納邊將賂又善造食飲饋要路人  
爲言者彈劾去主事因言此孫職方爲之兩人銜公益  
深居恒所交往則王伯安李獻吉崔仲鳧邊廷實鄭善  
夫楊用修薛君采許伯誠顧華玉王稚欽顏惟喬周子  
賢咸一時名流非其人曾不一盼諸不得與者積不平  
以故官職方四載董外補滇提學副使滇文獻不敢與  
上國齒而公才名冠世士縮縮懼見鄙夷公獨爲寬科  
條凡試士旣命題度不盡記者示以所由曰稟質由人



撰詞由質苟不及此卽宿構何爲已定優劣必問其長  
吏博士曰士得無遺乎吾安能以一日槩生平有則舉  
復試復收錄之士無不奮厲譽髦相望矣御史某欲合  
試諸應舉者公持之曰非制約士以八月五日始集會  
城御史卒不得試其僚由左布政使遷爲都御史撫滇  
遷之日勅諸司不得乘輿傳呼公曰制內三品始得輿  
外三司輿非制也然都御史爲布政時業已先之且都  
御史輿四人耳今用八而以禁人不輿是五十步笑百  
步走也都御史爲斂容謝公卒乘輿傳呼御史都御史  
內愧公復有萋菲者公不置辨而思其家大人老遂掛

冠歸歸則布衣行田間雜僮僕操作性不勝酒日伊吾  
如諸生絕迹公府諸當道重其名或就見及詢民疾苦  
侃侃正言終不及私霍大宰方殿學疏薦公時致書起  
居公不報卽報亦寒暄常語無所謝卒之日春秋才五  
十有九耳所著有石磯集磯園稗史一笑備采二集忠  
宣明山兩先生言行錄藏於家滁州孫存論之曰世其  
爲郎時獨師大復著道巾乘羸馬人以爲行怪僕謂其  
心有所得不同於俗又見叔世人波蕩風靡不可挽回  
小視之儀準不可則止耳每行縣至華容常著一敝絹  
直領步行相訪同飯而出略無自異之色洪水且潰隄



蓬首跣足與齊民同執版鍾行隄所全活人無數至論人取有執守者不以圓融爲能或抑揚大過故不與時合人以爲篤論云配嚴宜人刑部主事仲洪公女也溫惠淑慎動合內則身貴家女能爲勤苦織儉從公居辟雍及官內外不市一靡麗物以佐公廉旣貴有二子一女俱才而益爲廣勝侍務多子里婦難產者生子天昏者痘疹疾痛者廝役扈養饑寒無告者所以調護周卹甚備漁人登楚賢書逾月伯子玉山舉順天報又至公喜不勝宜人獨感然曰方懼其滿耳公大稱善自少迨老日率諸女奴蒔蔬績麻供中饋唯謹公專攻問學所

居官以清正著聲宜人有內助功生二男子一女子長宗玉山縣知縣娶王某女次卽宜一再上春官遂不復仕自署洞庭漁人娶嚴某女女適黎勉期邑諸生側室張氏生一男子一女子子完邑庠生女適程宗孔側室鍾氏生一女子適周梗俱邑諸生孫男子五人長卽斯億博學宏詞爲布衣雄長次卽斯傳宗出者斯伋斯保完出者斯佑俱邑諸生曾孫某某人羽侯爲長無不績文好修者謝氏芝蘭王氏琳瑯未能或之先矣公生某年某月某日卒某年某月某日葬以某年某月某日墓在某所宜人生成化癸卯十月朔卒嘉靖己未二月晦



壽七十有七祔葬公右公葬某十餘年而羽侯始爲狀  
屬年家子李維楨爲之銘曰人有恒言文士無行不見  
孫觀察逆耳批鱗觸邪指佞廉吏不可爲子孫被褐而  
負薪胡貴乃貧其後振振儒冠儒紳繼踵相因循無多  
積書積書疇能讀插架萬軸施及雲仍爲舌耕爲掌錄  
爲下帷穿榻爲爨薪節燭弓冶箕裘塗茨丹雘習與性  
成述而不作粵有女士舉止詳妍旣諧琴瑟亦效韋弦  
令妻壽母比德罔愆百歲同歸表以新阡鳳有丹穴玉  
有藍田其麗不億於萬斯年

山西按察司副使薛公趙安人墓志銘

薛公名騰蛟字某渭南酒曲里人也父某爲鄒邾城驛  
丞會流賊起挈其婦王居兗郡僦郡丞李公之別館居  
焉因生公故公自號鄒嶧山人復號南岡山人五歲父  
稍遷莒州千戶所吏目母攜公還渭南父尋以喪母歸  
服除除保寧千戶所公年十二從之官受學王先生爲  
比偶語居二歲所父以父喪歸更受學秦先生其兄騰  
霄爲涿鹿驛丞父就養公從之涿受學梁先生治禮經  
爲舉子業梁先生奇之六歲歸受學於二南先生始談  
名理二十二出就試爲諸生督學王鳳泉孔文谷公深  
加器許二十四舉鄉試第五人明年舉進士已授長治



縣令長治故潞州也嘉靖初盜據青山爲亂討而平之以州爲府而設縣附郡城中軍民雜處宗藩豪右不可問事一切取草創苟目前而已前令率坐不任職去公至官方定物賦職任功畢故刑宥閒罪振廢淹逮鰥寡政平民阜財用不匱御史大夫浚儀王公故潞人其族有以編氓見公而長揖者公笞之加役焉一士人爲潘王所訟公訊如法交譖公於王公所公不顧王公以此知公富人子鄭餘良當大辟亡命霸州迹得之壺關張珠家號萬羊亦當大辟咸以千金行貴人關說公絕不聽護衛諸卒有犯以其罪罪之不貸潘王聞時勅其下

人毋溷薛明府爲也定挈令諸廐傳馬必三歲乃更汰里甲月米丁口庸調歲不過三分無名之征悉蠲之藩祿二千石主者再倍而後得入定爲十之二前後凡省民數萬金三年治理流聞遷南京戶部浙江司主事督儲南都中都料量稱平累遷廣西司員外郎福建司郎中三載考最封父如其官母妻俱安人踰年有母喪服除除戶部山東司郎中不一歲遷四川按察司僉事分巡川東東鄉尹錢若愚貪墨無顧籍卽案劾之銅梁大盜朱洪受負固不可捕公密攜其黨自相攻盜乃散勢孤卒就縛而太平盜袁廷佐起所抄鹵人財物子女更



虐徐以計擒之殆盡而楚有征苗之役公監蜀兵轉饟以時賞勉罰偷士人人用命俘斬七百級捷聞賜曰金文綺先是督府檄楚蜀黔兵以九月畢集黔後期且一歲司餉者請奪諸軍三月餉公曰失期在黔而蜀蒙罰何以服人上書力諫乃止以父喪歸服除除河南無幾遷山西布政司右叅議分治大同大同遭悍卒變當事者懲羹吹虜務爲姑息公扶其桀驁者一軍肅然虜薄山陰甲上乘而禦人于郊者立殺之高秉倫溫習禮者中官高忠御史溫某從子也市首虜得官公寘諸理金吾齊整以貴人力居幕府與其帥抗行公抑之長跽庭

下又按其殺平人冒功罪幕府乃謝遣之威胡堡百戶匿名訟守備某平虜趙叅將亦爲麾下匿名訟所誣公廉得其主名試手筆有左驗當以死部曲快之而公已遷其省副使駐節陽和矣中丞某子甲庇私人多殺無辜公數翻異之以是銜公比右衛被圍急私令構解公持不可愈益恚而授計本兵謂公才不宜邊郡徙之內地公年四十有七喟然嘆曰吾骯髒自天性卽內地安往而不齟齬渭上丘壑無恙吾其老矣遂歸不復仕初錦衣叅軍沈鍊以劾分宜相戍邊蔚州守備羅鎧者阿邑相意屬得虜間詞連鍊事當下公勘而憚公亢直乃



以屬他人奏上誅鍊等督府以下受上賞其後分宜敗鍊寃白督府諸人抵罪而公不染於辭

穆宗朝詔舉文武臣廢棄者公在啓事中以無援罷

今上上兩宮徽號生元子兩以覃恩進階亞中中

議大夫贊治尹里居垂五十年不干謁公府獨好書大寒暑伊吾不輟嘗言老人強入少年游不韻得坐而與古人上下論議致足樂也墳典丘索子史騷選旁及百家衆技究其指歸而咀其英華義所未安必爲詳駁其於經義多發明不盡主宋儒而於詩書尤備旣登第始受室而又善攝生食不兼味膾不厭細對客嚼湯餅或

各一事必更進飯一盂居恒服七真至寶丹修髯隆準華髮方瞳望之類神仙中人年踰八十尚舉二子其課子嚴臧獲數千指無一違令者所師南先生已卒歲時起居南恭人如家人子同榜劉職方某者早世婦誓不踐二庭爲經紀其家卒成其婦志云趙安人者臨潼新豐里人儀部郎驪山公統長女也少端靚人罕見其言笑旣貴人女歸卽爲貴人婦而退然自下事君舅君姑悉準內則中饋之事身執其勞不以貽娣姒姑性嚴安人將順無違從公宦內言不出於相御家衆有恩未嘗假以色衣弋綈敝垢輒浣補數舉子不育簡諸勝侍公



有子身哺乳之諸媵或去或沒終其身無一人間言諸子長有室諸媵各稱姑受其子婦之養安人了不爲異也晚年公以陸賈例迺食諸子安人獨依子莊不遷所字惟二女足不得踰閩及笄所親或不識其面與公白首無媒容公或盛怒必曲解之有所欲施贊之惟恐後驪山公坐累下詔獄幾三十年歸則老矣安人見而喜懼交集二弟汰喪其產安人養父盡歡待二弟如故獨無所餽貽人問故曰吾懼其恃我而更汰耳與公卒同歲先五月而少九歲公生正德辛未五月二日卒萬曆己亥五月八日年八十有九安人生正德庚辰十有一

月十有二日卒正月二日甫八十以某年某月某日合葬潛水南原阡男子五人莊諸生娶姜某女先公卒娶王應誠女繼尹某女萱諸生娶李某女蘅薰幼其母皆副室女子子六人長歸鴻臚寺序班白絢次歸吏部司務張養蒙者趙安人出也歸賀某歸張某歸王某與幼未字者皆副室出孫男子孫女子各六人余嘗道渭南見其里先生長者四人少司馬孟公京兆尹孫公憲副南公與公也司馬京兆位通顯兩公淹抑外服而南公子孫多由甲乙科爲美官其年皆不逮公天之乘除損益不爽矣公所著有南岡漫稿詩書意解若干卷兩



子爲諸生者及婿張君實出余門下余雅習公爲人張君具公安人軼事及公所自爲敘乞墓志銘余不得辭銘曰謂公位嗇而年登貧賤昏札天曷不矜謂公皆能以永年幼艾嬰孺耄胡有焉學無常師行不標奇進能其官退與鄉宜上庠憲老社則祭之亦有哲婦年均德齊嗟乎公其於天爲竊於人爲畸者耶

雲南按察司僉事劉公陳安人墓志銘

故觀察劉公長欽之舉進士也與余同出西陵劉司空先生之門公形貌昷麗風度凝遠而又善文辭金馬承明著作之庭非公莫可使者余不佞猥得代匱而公出

爲南昌令坐蜚語調浙臨安謫山西布政司理問稍遷令石樓久之入爲南京評事寺正擢僉雲南按察事皆就常調不塞天下心又卒廢不用位不過下大夫年才六十有二惜哉公名紹恤長欽其字先世洛陽人國初祖德海徙楚家安陸之鳳凰池下四傳爲贈廷尉公鵬卽公父也廷尉公嗇於財而好施視人之急若自在隘窘之中奉漏甕沃焦釜屢空矣其初娶葉安人無子繼以冉太安人四十有三而舉公已舉仲子繼恤公明惠不羣未齒讀書能強記應對如流廷尉公退而耕於野仲子從其父坐織蕢立柱甫栩栩然樂也公涕泣不之



田兒聞祿萬鍾者不祠而福不貸而足何自苦爲棄捐  
在外無師傅經承窮年沒壽不免爲辱人賤行矣兒請  
以舌耕廷尉公壯之攜公歸邑屋從父郁爲諸生知名  
時過廷尉公奇公象貌以爲非常人使屬文大稱善吾  
家積德百餘年天其或者將建諸必此子矣廷尉公喜  
益不惜貲遣公從經師學夜必試一藝奏其草甫退年  
十三受知邑令曾公加諸膝摩挲之置第一人郡伯及  
督學使喬公試亦如之補邑諸生其後郡伯徐公督學  
使林公與諸部使者試胥如之而公已受室陳安人溺  
苦於學如初乙卯督學使吳公初上校楚應試士三千

人復第一遂舉鄉試明年病不得上春官己未壬戌兩  
試復不第而里人鄒朝臣通大司徒賦浮繫無歸走告  
公割其資斧以償爲取司徒牒還報朝臣因投牒質公  
而公聞廷尉公病并道趨子舍橐如洗計後事無所措  
有司迫得朝臣牒因畀之不復問日夕視父疾衣焦不  
申頭塵不去匍伏而謁諸醫曰剗吾類破吾家苟可活  
吾親無辭爲之卒弗瘳公跪而取筆牘受言廷尉公指  
仲子小女而拊公背是待若而婚嫁吾目待若而瞑公  
敬諾大人幸自愛兒如負諾者及黃泉無相見也廷尉  
公乃瞑朝夕臨及思至賓客弔省號踊哀絕而陳安人



稱媿棺斂諸物竭誠盡慎迄葬無缺禮獨不用浮屠教  
家董礲确田五十畝食不足則授徒以束修養母陳安  
人機杵井曰功參半焉乙丑又不第貧滋甚而女弟且  
行陳安人盡徹其環瑱裝送公乃得專心讀書白兆山  
中者三年戊辰舉進士或從史公宜有所附離公曰行  
百里者半九十此言末路之難吾跬步始進而以多岐  
亡羊乎令何負人哉人自負耳旣奉冉安人之南昌南  
昌行四差法猾吏竄其籍倍徵民莫可究詰公精心爲  
算以次收事不忒而民歡樂之巨室多畜黠桀奴履絲  
曳縞炫熿於道公督過無貸有萬權者侵牟公帑巨萬

郡守大索之至其門祠疑虛喝高躍而不敢進且十餘  
年公迹之則郡王邸保舍耳以計就禽而王子有惡其  
妾之弟王玉成者嗾盜誣之獄成亦十餘年公爲理出  
顧御史取其事薦公庚午大比士公在事某子甲貴甚  
矣而主斷以其子從游丐爲地公謝絕之某子甲慚中  
公南臺省南臺省言公所舉士不當下禮部覆試士咸  
中率乃免然竟用不及例移臨安首禁其俗不躓者四  
事曰婚姻論財曰親死不葬曰好訟廢業曰私煮海觸  
禁民相戒莫敢犯邑歲輸京絹萬疋而令收其羨千金  
供交際公一無所取父老德公百餘人人持一縷爲公



壽而實金銀酒器其中公不知也內之陳安人檢白公  
公怒召父老責問故皆肉袒請要領之罪然後已入覲  
民扶老攜幼送之中道終日更私置金茶裹以進公懲  
前事令衆啓之得金復謝曰父老豈以令前日之辭爲  
面謾耶極知父老念我厚然而計之於道歸之於義以  
爲不可故不受也令誠自愧亡素不足以信父老父老  
祇辱民益服其廉生祀公而郡守復與憾公者有連讒  
公必不宜一日在位豕宰張公杭人故悉公奪守官而  
左遷公晉藩幕以殺讒口大司馬方公召公案行塞故  
事副帥以下負弩矢迎境上蛇行蒲伏避舍納筦鍵攝

衽抱几視膳堂下交酬好貨皆厚公第將數騎從人或  
不知其至至則食不兼味馬餼不過稂莠引諸帥上坐  
與鈞禮延見吏民里父問謠俗疾苦瑣科條其人還具  
對將士能不脉地形險阻殺塞谿谷決利害之備循功  
勞視次第如指諸掌虜自款市邊吏不習戰爭言築長  
城公奏記方公曰虜狼子野心刑馬壓羊而盟願臣畜  
而朝其可恃乎士不能蹠勁弩帶利箭馳肥馬坐作進  
退不共命餘子力盡於溝壘甲冑羽毛剝敝民不得耕  
作輓賃不可給雖隆邊之城造於天猶之無益也夫比  
目之魚不相得則不能行古人稱之以其合兩而如一



也今將畫地而守士乘亭障者參列多不過百人猝有  
虜其何能禦宜聚而訓練使力不分此爲一千里之馬  
千里之服而纏牽長必不得矣纏牽於事萬分之一也  
而難千里之行今爲將纏牽者多矣將能而不御者勝  
此爲一日月暉於外其賊在於內謹備其所憎而禍在  
其所愛今某所嘗中虜輒城之異日者虜復從別道入  
更城之百入而百城百城而百瑕聖人有金城豈在是  
乎此爲一塵飯塗羹不可療饑將所貴提戈殺賊耳而  
俗顧尚文雅歌投壺輕裘緩帶平晝閒居可也以遏虜  
將焉用之此爲一方公起彷徨爲思所納行之多效已

令石樓其民陶復陶穴而處所供多邊餉藩祿藩祿可  
用他物充邊餉非兼金不可民窘日流亡而餉益乏公  
爲更之語具都御史高公疏中下戶部如公議旁六州  
邑亦視石樓石樓士絕科第公言有司教之不先耳何  
患無士爲玉暉書院豐旣廩董振擇之自是有登賢能  
書者嘗從田直指行他縣而縣庫失七白金幕歸獄守  
者且死公怪守者么膺子不任盜飭吏趨而前覺有異  
一訊具服以遷廷平行石樓與其鄰六州邑人爭來卧  
公轍不識劉明府何狀而造福我西土若是呼泣震野  
公亦爲泣廷平事取財比部吏操牘鴈鴛書而已公執



法不阿邑大司寇所出入廷折之務得其平豪某與貴人錢通擊斷無諱公出醉而遮馬首前訶者止之對曰雖鞭之長及馬腹乎公發檄所司捕得之立致其罪而貴人爲關說者書盈案無及矣大璫爲同列所覆沒與死比察而原之昏夜挾千金來謝不受此兩事甚爲南都人所推而忌者亦頗藉爲謗端于時鄔朝臣復以南糧後期當罰公爲言而免之或曰是負心人公不聽吾施寧望報乎三年上計贈父如其官封母太孺人婦孺人始公爲寺正猶署職而會

上生元子覃恩臣僚公乃實授父母婦亦晉封寺正安

人云先是江陵相憐公才义厄下僚而劉司空與曾司空更推挽之欲授公河南督學使及光祿丞公固辭吾三爲令而再謫以有今日足償躋矣一旦秉文衡列九卿人且求多於我退而語所親江陵乘至盛獨行一意其爲人也近苦矣士杜口裹足怨結於心川壅而潰傷人必多張氏之禍朝不謀夕安可嚮邇乎其年江陵果敗而同舍郎好文致人罪銜公多平反是以有雲南除若曰投荒云爾黔國監奴齟齬民昆明令執之奴誘黔國劾令下兩臺兩臺下公公悉捕治諸不法者黔國迫使使請公公曉其使曰吾與若主手受太府之憲爲天



子共治一方民令誠病民吾安得庇之若舍中兒誠病  
民吾安得庇之令民知有天子法知若主能不私其舍  
中兒亢義益國不尚有利乎黔國語塞其下稍戢而羅  
雄州酋者繼榮左手過膝髮長委地殺其父自立潛蓄  
異謀弟繼仁告變公使百戶把維岳往探虛實繼榮囚  
之公憤曰長此安窮力請討賊候者言賊以八千衆抵  
曲靖公檄賊陽示撫而與爲師期因陽貽書把百戶賊  
誠先發幸甚我以大兵當其前普鮮兵襲其後衷賊擊  
之無噍類矣我兵某所覆某所覆汝謂覆者勿多殺百  
戶復陽墮書視賊賊疑不進詣百戶詐降公許之復爲

檄示撫而行間其左右挾六丁六甲妖術者則我兵大  
集矣公與帥劉綖謀曰賊所居三面塞大江獨師宗一  
線肩摩行我兵輕入賊守隘而斷我歸路奈何卽衆悉  
入而戰賊必退守東龍寨寨險不可拔無芻牧薪採餉  
道不通雖有大武遠宅不涉姑揚兵境外徐其攻而留  
其日率敢死士七百人走間道火攻奪東龍寨降者四  
千餘人賊聞東龍失舉火焚州中大寨奔普德公料賊  
以普德餌我耳勢必走馬蚌而謀者謂賊以萬金賄普  
鮮假道馬蚌走交趾普鮮長隆有義不敢受公令指揮  
張先聲千戶周宗堯趣普鮮受之衆言非便公曰鹿死



不擇音必且還走而冒人受之彼以為隱蔽志情可坐困也兵攻普德賊果遁公令周宗堯王寶等以千人覆阿拜江而賊方士王道甲胃持大刀偽為賊給我潛以其眾渡江百戶李約覺其詐舍而奔賊禽之賊力鬪我兵有溺水者恐不能生得賊傳藥弩射之斬其首餘悉降乙酉十有二月二十有八日也計用兵不滿一月明年大計吏距江陵死三年家見籍諸繇之起家者誅逐無孑遺而憾者至指公為黨罷之公笑曰我誠黨江陵寧十八年而甫僉事又遠在萬里外耶遂行吏白當括贖賑助行李公復笑曰使予欲富何待今日且也窮巷

掘門桑戶捲樞之士耳為天子命吏飯封祿之粟載方府之金猶未足乎踰年而覈功者以前誅者賊狀上賜金幣北向拜稽首

上幸不遺逐臣標末之功勝九遷其官矣置酒高會與仲子共樂之而仲子產倍公猶仰公如外府又用氣多所陵折公和顏色而下之故友彭生家廢日與同案食復為置田數十畝有言生短者公譬之故者無失其為故耳至於哀鰥寡卹孤獨不待顛蹶之情望拜之謁赴之唯恐後矣生平不問家人生產而好蓄書吾伊如諸生家人竊笑之是尚欲應舉子乎擇族弟子善者教之



里中少年受經問業不絕於門見里兒褐父必折節示  
恭而非其義不可干有司嚴重公時舉稅政及困厄無  
俚之至者罷解之卽其人莫知所從出也事關諸生言  
之尤力有司或盛氣而揖之入而徐趨至而自謝必申  
其說乃已甲午春冉安人病呼天頭搶地請以身代奔  
告城隍之神泣血目盡虺母乃安忽語二子乃公賴先  
人餘緒三十年家無哭泣之哀此後當不免矣已讀晉  
書厭其詞不馴雅將釐正之復投筆曰吾不能以有限  
之日爲此無何陳安人卒陳安人者故居士陳堯仁女  
歸公而食貧則以勤佐公費稍裕則佐公施勑制僮御

內外謔稟分解趣理事如公指旣貴而服大繒裙不加  
緣食不厭藜藿年六十稱姑矣事冉安人必莊行則僂  
身自卑不命坐必侍立推公之愛與其姑姊和睦無違  
言臧獲千指皆加恩借公晚而以絲竹陶寫倡優侏儒  
之笑不乏皆於安人取給焉忽病卒公羸不可致哀卒  
起不意伏尸而哭失其度俛俛如無之後安人二月而  
卒卒之翼日冉安人初度春秋八十矣語二子吾與而  
母不獲終事而王母孺子勉之朝夕破涕承歡無以我  
夫婦爲念通國中踐石以上偕來喪公盡哀卿大夫博  
士弟子稱公孝弟廉讓請祀之學官公卒萬曆乙未二



月十有七日生嘉靖甲午十有二月十有三日安人生  
嘉靖乙未五月十有三日卒萬曆甲午十有一月十有  
八日不及公者二歲以公卒之年十月十日合葬槎山  
之陽二子長啓忱娶于楊縣簿煥女次啓恂娶于鄒諸  
生尚象女繼胡太學來學女女一嫁太學李必遂太守  
幼淑季子俱安人出孫三士琳娶楊惟柱女方伯芷女  
孫士琅聘太學鍾鏞女令文瑞女孫士璨未聘啓忱出  
孫女三一字諸生張鳳翔子諸生素蘊一字郡丞董儀  
子某啓忱出一未字啓恂出公所著有白兆天目姑射  
鍾阜諸稿凡若干卷銘曰嘉隆之代人宗司馬譬諸女

閭鉛華姚冶浣汰求質合者寔寡獨公論撰豐腴妍雅  
琢字成句琢句成篇既規古昔亦近自然鼎鏤繡錯玉  
潤珠圓聲音象貌楚孟魏涓秦有允寧蜀有少海學步  
龍門建標詞壘王或伉浪任晚休息公舍其瑕惟瑜是  
采匪直也文武事故優雲中上谷婉婉善謀碧鷄金馬  
蠢爾爲仇北之堂上莫不懷柔才未究施名復不振耳  
貴目賤心疑跡信世道交喪在公何覺浮生若寄浮榮  
若薜四百年後太玄乃興藏之名山作者取徵清發淪  
漣白兆峻嶒天畀女士窈窕作朋

南康守顧公施孺人墓志銘



張江陵爲天下口實至今未已江陵救時之相也憐才最亟所錄用多僑傑槩目以黨錮之如顧公惜哉公名爾行字孟先幼識悟過人內無關鑰卽途遘卒遇言必傾寫而恥齷齪小禮面折人過人不堪忍心悔之故號傲韋云初司理大名郡歸省王父九十無恙語之無以贈若惟多活人耳奉其言平亭疑獄傅生比甚衆有後母與前母子訟不問第下其子獄中居數日泣而自言無狀請服要領之罪其母亦泣請釋子遂爲母子如初晉萬公世德爲屬邑令擢司馬郎吏挽舟不得發以失帑金數百公曰萬君幹時之器寧有此按之則諸司交

際下縣括贖緩亡何有假常供應者也勞謝萬公勉旃自愛捐月奉若羨賦爲償萬後以功名終旁郡令張延廷悃悃無華獨推轂仕郡守爲時循吏進諸校士課其文藝周其空乏拯其患難起家天官尚書郎者三人他稱是諸臺奉江陵教裁冗役冗食毛舉細故虧損大體公裒益適中論覆往返莫能易也議上江陵知出公手稱善治行冠諸郡登薦書三十許最後江陵入朝過邯鄲諸郡吏修謁咨公事應當時之變如數一二江陵益喜徵拜陝西道御史巡通倉河漕主者稽故領漕官秋盡不得返公勅諸材官魚貫入以次受餉不頃時而畢



左右無所容奸漕艘不留行踴躍歌呼顧侍御生我乞  
再借一年興舉科條爲久遠利事竣例薦諸材官丐朝  
貴請託不聽所甄拔往往乘鉞分聞有聲江南白糧私  
費幾與公課等中貴人薦賄箠楚圍奪死徒相繼公白  
政府與中貴人掌司禮者裁其太甚疏著爲式所省數  
萬已陳五議指畫利害甚具又言漕粟出吳越過半賦  
役偏而田畝不均積貯空而預備無術拮据滋而徵斂  
非法堤坊圯而旱潦爲災豪強熾而軍民胥病爲十二  
事以聞詔曰可江南受賜無窮已按順天江陵鄉人爲  
少宰以子制義求評目公序行之臺省建白每報罷獨

公言無飾無蔓入卽施行事率關度支恥形短者側目  
是江陵私人而摘武試有所曲狗出爲南康太守卽解  
綬歸築遠園亭池精整花竹妍秀輦其父與客歌嘯爲  
歡一日無客忽忽有如失性不飲而喜飲者不醉無歸  
父八十甫卒身踰艾哀猶孺子善諸弟有無相通季弟  
擄捕減產規之不從給之不受恚不相見泣而思客爲  
畫策能與弟同好則可召弟及其客來令客佯負而弟  
日以百錢歸公乃大快兄弟若女弟子女婚嫁悉仰給  
公羣從有犯于官泣于庭而免之客以爲辱公笑曰以  
辱易人死不辱矣修家譜合族歲時伏臘舉祭徹俎饗



餽割名田百餘畝分義祭役三端助貧者親知鄉里有  
急來謁必應陸茂才能詩而酗酒坐病廢故人衣裾不  
撤其門公每就之共榻款語申旦方別陳里役十二事  
救荒十議詳盡剴切鄉人談說不衰少治易工制義極  
爲舅氏茅公學使薛公所賞與胡中丞許少司馬齊名  
陶文僖見之曰君有史筆何不學春秋舉京兆第三人  
遂成進士出王文肅公門垂老課門人及子弟取所撰  
刪潤卽成佳製若施沈閔諸公與弟爾志受切磋之益  
先後成名爲萬卷樓貯書校讎揚扃不休晚年籃輿畫  
舫以聲伎從登涉境內佳山水累月若惟日不足者其

卒也微示疾著進賢冠而坐叩以後事不答元配施孺  
人父梅池翁母唐宜人竒其相女丈夫也覓快婿以歸  
公公家督孺人相之事有禮法以其奩克脂膏筆札費  
賓朋過從若問字受經者治具豐潔不替公北游太學  
出機杼刀尺之餘入貲旣貴而時念之非細君何有今  
日從公大名不內官中物公母茅孺人早沒而王父若  
王母丘繼母沈養志無方孺人修婦道唯謹顧善病枕  
上指授咸切事情公父恒言吾家病婦勝壯男子前姑  
遺兩子後姑遺兩子兩女育之如姑外生女孤女之如  
兩小姑伯子未抱孫虞其終鮮進二姬侍公舉三子子



之如伯子與公白首不忤視每以慈劑公之寬公初不覺事定始悟卿卽吾佩韋矣何遠求焉生平慎言語節飲食卒之日神氣恬然兄奉議公哭之歸語人吾與妹氏居七十年不謂善攝生乃爾公生嘉靖丙申四月十有二日卒萬曆辛亥二月二十有七日年七十有七孺人生嘉靖丁酉某月某日卒萬曆辛亥某月某日年七十有二合葬韶林新阡三黨親戚四方義故通國之人執紼酌絮酒莫不盡哀子四伯堯京太學生娶邑令沈某女施孺人出仲簡太學生娶奉常潘某女叔鳳翥娶比部沈某女俱側室楊出季鳳威聘孝廉費某女側室

陳出孫女二字孝廉支某子某進士錢某子某堯京出公爲宋龍圖閣學士臨後裔自會稽徙吳興韶林代有聞人父養默公某師唐一庵先生以明經爲富川令母茅鹿門先生姊狀公者弟孝廉爾志狀孺人者孺人兄子壽朋雖多情至語而無溢美仲子字默孫吳興號佳公子介其父友吳允兆屬余志允兆傳公有獨知之契公與濟南邢子愿舉進士同科授御史同臺被謗同事余善子愿子愿言江陵客有憾于參政某屬緹綺迹之公解構不令人知所言事皆職守未嘗阿邑中傷善類諸附江陵黨貴者叛去反噬公不避人臨其喪夫弔張



讓父受蔡京薦難乎免于今之世矣何有于公余是以具論之銘曰宗族稱孝友焉鄉黨稱慈惠焉畿以內江以南生相愛死相憐貴爲二千石年則老而傳有婦儷德有子象賢人何不足天亦全考石勒銘坎及泉貽爾後昆世永延

戶部郎中龍公唐宜人墓志銘

楚世家有武陵龍氏薦紳踵武于朝而渠陽公父子兄弟最著余兄弟兩與龍氏同籍悉其懿美又託交仲子君御甚稔獨未見公及伯子君超爲缺事耳比歲公與元配唐宜人伯子先後卒君御使使不遠三千里以墓

志見屬蓋君超嘗欲狀兩尊人不勝哀未就君御甫爲狀若蘊結未吐者余鄉往公五十年于茲卽文不逮君御萬一義無得委也公名德孚字伯貞別號渠陽亦號玄扈又自稱嬾龍生其父爲中憲公某以兵部郎出守十年不調乃老其稱中憲與母傳恭人俱以公加贈也唐宜人父爲桃源孝廉某母爲鄒孺人中憲公四子公爲季其少也婉以從令游有鄉處有所好學而不戲從父官南都師金樂山先生交四方名士領受秘奧爲文矯矯竒氣郡守黃公以異才拔冠曹偶宜人父母惟息女慧悟不群相攸歸公持家秉若素練奉尊章承歡備



物懷與安實疾大事未嘗不以雞鳴規公也公業大進  
戊午登鄉書從鄉人蔣道林先生學以慎獨爲本內行  
蓋飭遠邇趨慕接迹過從客常滿座談論燕會宜人主  
中饋應之如嚮省嗇生殖事當公意不復顧問矣伯仲  
之在妊也法古胎教啓居飲食動不踰則旣就外傳日  
考而習戒備畢具夜置座右焚膏督課之成幼而不倦  
仲舉于鄉公偕上南宮明年仲成進士爲新安李公與  
宜人就養宜人病亟還伯子亦舉于鄉宜人病良已公  
偕伯子上南宮復報罷尋謁選人除衛輝郡李疑獄數  
十年不決片言立剖直指屬巡察旁郡直而衷周而淑

恥摭撫微細博名高惟以伸冤滯爲務有同里人賈而  
匿其橐殺之者訟于官無左驗公爲文告城隍神越日  
其人若鬼伯榜掠自繫詣前曰某實殺某一郡呼公神  
君斧鉞刀墨之民行刑不疚攝輝邑篆復百泉書院祀  
先賢已履畝定收事比綴以度無偏觴輝人德之築室  
生祠之百泉上其後學使吳公從衛士請祀名宦是時  
宜人從公公卽外出家人無敢窺闕外治行最諸郡當  
拜臺省以忌口稍遷寧波郡丞携兩僮往郡多貴臣族  
衆監奴不盡循理無賴借名方行必裁以法編戶安堵  
焉歲旱露禱雨立至茂穡勸分爲粥食饑散廩以賑雖



窮里空舍咸身視之所活鉅萬島寇蠢動震鄰奉檄城  
慈谿三月城成有金湯之固以定民弭憂而覈還清道  
觀故物空中見五色雲創姚江石橋歲免溺者無算事  
具三異錄有丞尉守官無過不能媚事舊令中之中丞  
臺以付公公具白所以丞尉得全清吏恃以無恐顏學  
使紀其德政沈相國傳之四明人家尸祝公也慈谿則  
有名宦祠陸莊簡公察廉遷南京戶部員外郎司淮安  
權政諸不便商民者釐革制量商爲立祠甫五月有去  
志不待報而行先是仲子爲國子先生宜人從  
上采民間女人宮不及月多以忤旨死會再采都人懼

號泣聲不絕仲子上書是將靡上躬妨國家語極切直  
衆爲仲子危之宜人獨喜有如萬一回天聽光主德造  
福京輦卽得罪吾有餘榮矣公居淮仲子以宜人入淮  
蓋不面者七年而以黃姬助造比還里黃舉叔子宜人  
視黃如娣姒愛叔子甚于己子晝夜不釋懷爲置宅器  
用悉舉身所服御美好貯笥中以貽之曰若兩兄能自  
給念此兒生晚阿翁亡何有也已簡美對得賴氏女布  
幣行禮從其厚者武陵稱宜人賢以此爲首公初病風  
仲子謫居湟中將棄官歸公不可吾聞勤營其君者在  
險無懟河外四郊多壘甲兵鈍弊民人離落日以憔悴



上乏使使若狃中軍之司馬固國之艱急是爲可自逸  
乎仲子遂西獎帥將士驅名王出塞復河套大半旣移  
南曹歸省爲公七十壽庭中置名花奇石公徘徊吟賞  
意晏如也仲子復不欲行公曰軍伐有賞若以郡丞五  
品階而內遷僅下大夫豈以未復躋爲憾耶仲子遂南  
而伯子居子舍焚有司所爲勸駕公移以事公左右無  
方踰年公卒仲子畢三年喪者久之除戶部尋以僉憲  
備兵甘州宜人欲伯子北上趣仲子西征則携叔子俱  
之甘州踰年無病而逝公卒先一夕與伯子及諸孫論  
文發聖賢微言晨起整衣冠危坐而瞑生平暗室獨居

無情容與人無怒容夫婦相敬如賓父母有疾不脫衣  
而侍顛天以身代居喪瘠色洵涕然周旋序順事按禮  
經忌日如初喪者終其身伯兄以亢義直言陷文網旬  
旬救之得除博士讓以先世第宅塾師楊先生與母妻  
相隨死皆爲治葬經師金廣文貧爲具後事其子無志  
分鬻其棺復爲贖之所焚券若武弁袁氏子之屬甚衆  
惡夫施惠如出責者口絕不言淹浹百家行酒無量興  
至賦詩頃時數千言書法右軍河洛吳越間珍之所著  
文賦散失于火存者六卷皆詩中歲好道調息守環中  
晚事佛會泛海謁大士普陀焚經有靈驗遂精奉其法



屠儀部長卿記之十上不第三仕隨牒平進怡然不介  
于懷也歸結精舍德山築玄扈石室西郭命其樓曰對  
湘日不輟吟湘中之勝旣所篤愛又刻意于詩遂以對  
湘名其詩草焉宜人以勤佐公力學以儉佐公治產以  
廉佐公守官以慈佐公行仁自三黨逮四境衣食饑寒  
周給婚葬公所欲爲將順之公所未及先啓之通國無  
男女少長生則銜恩祈年沒則哭臨慨嘆蓋不可數計  
周知也公父至德可師具汪司馬伯玉表中公以仲子  
進封郎中修正庶尹宜人以公卒後令甲稱太云子二  
伯子名襄字君超以文行名娶柳某女仲子名膺字君

御官陝西按察副使論功晉叅政候召用文武相資並  
用社稷之衛也娶唐某女繼大理卿陳文燭女再繼唐  
某女皆宜人出叔子京黃出娶賴某女孫男某人伯子  
出者人儀廩生人僖人儂仲子出者人儼庠生人  
修人偃京出者人傳人佳人儷孫女某人別駕祝九龍  
子庠生劍祝侍御史唐鍊孫中書某子鶴沔陽陳太學  
之達卽文燭孫太常姚學閔子庠生孫仕沔陽庠生張  
熙比部曾某子庠生之毅其已適者也劍祝繼室亦孫  
女少者字周登先陳某曾孫某人之濬之湫之漪之瀾  
之沖之洸之濤之溥之澄之涵之淙之瀛曾孫女某人



長爲陳竒學婦次字周某餘未字公生嘉靖辛卯九月  
六日卒萬曆壬寅二月四日年七十有二宜人生嘉靖  
癸巳八月二日卒萬曆丁未十月八日年七十有五墓  
在某所宜人同穴禮也銘曰史所載古之賢孝友文學  
循吏知足各爲傳以傳吁嗟龍公四美全公真龍耶或  
潛或見或躍在淵在田吾無間然龍德天德也人貌而  
行天天所篤右胡不備焉令子爲後哲父爲前相以女  
士偕老齊年和柔義正二物靡愆尊朝貴室帝命數宣  
中游仙晚安禪誦而想見者遺篇過而致敬者新阡俎  
豆蒸嘗淇浙淮嘯永不騫兮名如山流不息兮澤如川

李滄州公胡孫兩孺人子孝廉杜孺人墓志銘

青浦李孝廉仍啓手狀王父母父母行事七千餘言凄  
愴切至猶若噎未盡吐而委不佞志墓中石不佞知仍  
啓賢非無美而稱者之誣其親也節而爲之志李始祖  
遂荊州人宋末仕浙西漕司以亂離家青浦竹岡八傳  
高王父順軒公異曾王父茭汀公堂王父見汀公名安  
詳字元定選貢入南太學萬曆己卯舉應天試知滄州  
再知保安州王母三曰沈曰金曰胡如王母一曰孫父  
玄同公名南春字賓卿以上海諸生入北太學萬曆辛  
卯舉順天試配杜孺人生子卽仍啓名繼佑以青浦諸



生入太學萬曆壬子舉順天試第三人沈金二母蚤世仍啓遠事胡孫孫則父生母也見汀公多善行而最著者曰孝嘉靖甲寅倭蹂躪松江諸邑公時爲諸生扶侍父竄突遇倭衆驚散走與父相失泣而跽日下矢曰必以要領易吾父不者有如此日已稍聞父所在私念不勝憤語或侵賊父子將血賊刃欲生吾父而顧死之乎沛公吾師也賊方陳魚而觀之諸係纍呼賊大王乞命不絕口一賊西南來公揖而迎之曰某願代老父爲大王受役父見公號咷不已公強笑謂父何懼大王仁者不殺翁殺翁不足示武翁老矣詎堪齒刀鋸賊衆目攝

之其魁踞鼓上坐跽而往訴魁以飯飯公取匕削箸頭涎沫投下公拾而大啜示不疑諸賊亦持羹脯相啗禮之去而出父所荷器置前公請代賊以他屬屬公執蓋父子相踵至津口賊乘船折木綿其係以紙簪公頭遂負父歸賊縱火焚兄竹沙公宅公馳救賊自火中操刃出連聲求金公對曰貧儒亡何有囊餘三錢携數歲占無不驗可取贈也已視所簪紙罷不問向後遇賊無復誰何者事平通國人目公孝子督學楚耿公記下郡李生蒙死求親賊因子全父顏其門曰至孝感夷公居恒言吾孝孰與吾父食貧養老母無方終其身中庸不可



能也吾白刃可蹈激一時意氣耳奈何以父取名識者益心服之茭汀公初娶于余再娶于華日者言華女必有貴子旣歸舉三子見汀公爲仲孩時卽向學父無以具師贄宗人江湄公竹沙公摩挲其頂曰此子必亢吾宗召入家塾與諸子共學所誦習倍同學者每食持黍肉之田間餉父與兄弟秉耒耜執桔槔爲服勞也年十六試于郡不收求再試守劉公難之吾問四目有不識一者退公對如響試之文立成劉公擊節稱善榜云優異童生李某遂爲郡諸生南湄公喜吾固知爲吾家後來之彥也更令從祖溪唐先生學學使周公拔第二人

始食廩遠近交延之爲師取月奉養父小優裕矣連喪兩婦青浦巨室胡翁聞公名誠得李郎爲婿快甚因愛室于胡胡孺人富家女而椎布操作日督家僮耕夜篝燈佐公讀謂公君有大志無庸家人產我則何可坐食取父所遺息之而公意不欲爲贅婿孺人亟諾同歸事舅姑卜築大浦之陽夾溝之側奉親以居身拮据畚耜間胡孺人洗腆酒食犒工工競勸而門下著錄子弟籍者日益金幣什九致父兄其一相胡孺人中饋也選貢法行公與選而孫孺人生玄同公矣孫瓜步人明惠有禮法事胡孺人若姑身若處子足不踰戶鎮日刺繡無



倦長子有婦舉孫遜謝不居此女禮有也家政非我所  
與聞以故胡孺人能安孫孺人亦安其子孫非已出者  
玄同公穎敏兩孺人課之嚴父舉于鄉公爲諸生搏心  
輯志于學爲古文辭詩歌與名士遞倡和所著太乙館  
藁士林珍賞之以例入太學父携之謁選國子先生岳  
公竒之以薦司成蕭公蕭公曰吾與李公南中游悉其  
人宜有令嗣鄉人張公若馮曾兩宗伯盛有稱引而父  
已知滄州閱月報公舉父歎曰吾起田間治一州爲大  
夫泰矣孺子乃復成名吾力學四十年始鄉薦孺子何  
易也胡孺人前稱賀公不色喜爲書戒子貶退繩約克

享有終居滄州二年精心政理民有夜逐田蕪誤傷行  
者坐大辟理出之滄瀕海訛言倭至檄州多下木石爲  
捷距賊舟費以千計詣中丞臺請曰某勿爲倭俘窺其  
無遠略何先自擾府檄民市馬草數萬束草腐民更市  
丞白府此爲胥卒牧人罔利耳不可行兵使檄募兵禦  
盜爭曰以歲儉故多盜而又增兵餉患且甚于盜宜招  
流移還南畝以養兵費爲牛種是渤海之已事也三事  
連挂上官積不平矣友李公喪哭而逆送之境厚爲之  
賻故人子奉使寄逕滄者不出迎吾父執不得詘體其  
人爲蜚語中之徙保安保安孤懸虜界謂諸將士吏民



吾老承乏當路塞軍旅之事未之學也惟乳哺二三鋒  
鏑遺黎耳無何當事者復以前事迫之去公笑曰是吾  
始願歸而見子婦克家諸孫繞膝爲歡宗戚朋友日相  
過從而喜可知也玄同公坐無客不歡無賢不肖必款  
留具禮赴義不辭艱險又好遊興至命駕不返顧必期  
盡四方名勝一切家具埤益杜孺人杜孺人生貴族而  
治生與胡孺人等仍啓自外傳歸謁母母恒坐機中所  
飯粗糲所衣大繒而玄同公與母御下嚴杜孺人劑之  
以寬虞夫寬之誨情也用勤自勵且以勵下不妄予不  
聞闡外事而隆禮于子之師致饋于夫之客佐祭佐養

佐施節文終遂焉玄同公少事兩母各適其意胡孺人  
或矚之輒覺而啼無母寧得有兒胡孺人亦泣而愈憐  
愛之杜孺人事姑無二心姑有織芥事之益虔其于祀  
事夙夜加毖見江公語人吾以子報國以婦持家以餘  
年爲德于鄉其可乎爲族人助婚嫁授田宅教其子弟  
召猶子貧者與居或資之本業振母黨失所者與華重  
親無令逃遠妻黨有子失恃卵翼而歸之胡爲怨家速  
于獄力脫之曰吾舅昔館甥我以我能不負耳里編戶  
受役重困踣盡室以逃首置田若干給承役者諸薦紳  
家贊之里無轉徙焉春秋與父老結社祈賽置酒餽餘



坐作以齒曰農之子常爲農吾不如老農耽同樂耳嘗  
習盧某幼時卽貴解衣推食卒爲斂以美櫝唐某奴竊  
其產納貴人魏某以博毀家指兄產爲已物亦納貴人  
公仗義執言得無失居太學門下有置妾而奸黨侮之  
中以法衆莫知計所出獨往排難把其黨陰事懼而解  
所友與高第弟子去爲顯官不可悉數而久要不忘不  
以生死易交情其慷慨急人難天性然也晚歲繕亭館  
闢畎圃植花竹眺聽嘯歌親故酬酢無厭而玄同公山  
居爲嵐氣所侵毒發肘背兩母及婦療之萬端創乃更  
劇忿曰疾不可爲矣徒累我親與我婦速盡爲幸不食

藥而卒卒年方三十父慟甚而自省生平無獲罪于  
何驟失佳兒天其以此扶床之孫副吾貽謀乎而杜孺  
人標踊涕泗告曰翁善自愛婦不任荼蓼旦夕從夫地  
下復煩翁爲兩兒父母矣見汀公益慟由是寢疾明年  
年六十有六集宗老及所善厚與訣吾爲下大夫不得  
徼一命馳父母修先墓地者未就父母卒遭亂與貧薄  
葬今殯我木無已美新婦勞未艾而遭大故勢無久理  
兩孤有婦之父兄在世德世祿必相存也婦設死令負  
之往遂卒不五月杜孺人亦卒年三十有二杜翁與其  
子部署喪事竟以兩外生歸又三年孫孺人卒年五十



有四又五年胡孺人卒年六十有五仍啓女弟及笄爲之遣嫁以辛亥冬卜地奉五喪厝焉主之以見汀公而王母父母祔之見汀公生嘉靖癸巳十月二十有三日卒萬曆戊戌八月二十有二日胡孺人生嘉靖壬寅正月十有九日卒萬曆丙午六月十有六日孫孺人生嘉靖戊申正月十有四日卒萬曆辛丑十月二十日玄同公生隆慶戊辰五月二十有九日卒萬曆丁酉十有一月四日杜孺人生隆慶丁卯二月二日卒萬曆戊戌十月有二月九日杜孺人父宗翹以子刑科給事中士全貴封如其官仍啓成宅相焉外家實與祖父生我同功君

子是以知見汀公之知人也仍啓娶某女子某人女某人女弟適台州守王孫熙子秉沖已酉舉順天鄉試仍啓有才名稱雲間龍傷其少孤不悉沈金兩孺人生卒月日與其父遺言遺文之詳母節格于例不得旌而見汀公年踰耆鄉人耳目日長往往誦說之其狀若噎未嘗有以也銘曰父稱孝焉子稱文焉維姑與婦抑有三賢父拙者官子厄者年俯不作人仰不愧天貽厥孫謀筆采管椽顯親令名金石爛然五玉同埋于彼新阡八

傑地靈神理綿綿

奉訓大夫成公宋宜人墓誌銘



長垣之有成氏也自處士公岱始其子孫脩四民之業  
日以昌熾而鄉舉偕計自睢陽公始成進士顯者爲睢  
陽從子中丞遜而冢孫文部伯龍繼之中丞爲余禮闈  
所進士備聞其家世久矣睢陽伯子我虛公蓮亦舉于  
鄉文部父也文部爲令爲郎例得以其貴貴父而父不  
可吾欲爲若太父不朽心藏之如吾病痿不忘起而身  
乃以孺子取名乎病革以所爲睢陽公狀屬文部兄弟  
必成吾志卒旣數月文部緒正舊草使使千里屬公志  
之余誠不敏亦所謂累世通家也義無可辭按狀處士  
公于兄弟八人中最少自山西高平始遷長垣獨能昇

其祖父櫬卜兆長垣厝之備嘗艱阻君子以爲孝娶文  
媪知書舉丈夫子三人伯文山公官仲近山公官卽中  
丞父叔卽公名宰字以贊別號忠山家以機杼爲業差  
足餬口公不屑也父母亦奇公骨相意氣不凡年十八  
從師學一年舉其辭二年通其義三年以屬文文成示  
諸先生諸先生皆善之而宋宜人來歸宜人烏林里處  
士惠季女知書略與姑同甫笄不溺帷幃之愛勉公鄉  
學公學大成則母婦之功與師友等文媪病且死若見  
二豎相促就道者忽辟易曰三舉人在也公時侍疾日  
夕不去左右顏色黧黑母寤語公聞冥司人言汝爲舉



人必矣可無恨第吾不及見耳遂卒公哭之毀迨老誦  
其言涕液交集也年二十七應郡縣試以第一人爲諸  
生又七年果爲舉人矣有司以金樹坊表閭會伯兄坐  
逋子錢窘甚遂舉前金償之向後家漸饒伯仲行賈業  
並起歲時置酒爲處士公壽處士善琵琶公兄弟皆能  
爲燕趙音酒半父歌而子和之餘響遏雲處士快曰雖  
有萬金不易此樂公跪而加觴曰雖有三公不易此養  
也仲兄病疫家人以俗忌逃匿公曰兄吾同體雖死將  
安避乎手湯藥以進日相卧起嘗夜渴呼漿公出求火  
天昏黑雨後淖盈尺無可措足俄有篝燈若前導者至

火所候不見仲得飲漿而瘡公竟無恙邑人以神所右  
也已而父卒罄其產營葬家且毀無可以供繼母陳甘  
毳謁選除安邑諭將迎母入官甫六日聞母喪歸矣時  
伯子已諸生兩弟俱有異稟構養中堂讀禮其中因教  
三子蔚爲令器服除補蘭陽學無何擢陳留令其政在  
嘔拊嫗掩齊民之形植黎累憂悲而不得志而抑勢家  
若鄉曲之俠爲民患者民以訟來知其情僞析毫剖芒  
其銳敏若腐肉齒利劍其判案若山不移嘗署其堂之  
柱曰追仲由之三善期有光於聖教守楊震之四知庶  
無玷于官箴人謂公無愧辭云同時祥符令朱正色儀



封令顧夢鯉俱名進士稱神君公儷之爲三五載稍遷  
守睢州州距邑百里而遠邑民失望哭送軹路旣而曰  
無憂卽有急走成公所耳治睢三載政如陳留而某子  
甲亦舉人也以氣力漁食閭里犯姦成富結納貴人有  
司不敢問匿罪囚塢壁中州使五百索之則縛五百榜  
掠雨下公踣足而怒呼騶導至其門捕監奴撻于市市  
人歡呼撥雲霧而覩青天矣橫民百千爲羣禦人而奪  
之皆椎埋掘冢道路以目在野雞岡老提嶺爲最害公  
密使人縛其魁服上刑黨盡走出境有殺人北城者街  
卒射聲尋逐不得以白公公素聞其中有無良數輩迹

之一人卧褥下有血刀詰之以屠彘對公齷然而笑屠  
彘何避人爲而負刀以卧語塞服辜曹倫左道惑人立  
氣矜奮勇力謀剽略郡縣城門書閉公視事自如廣設  
耳目縣重購禽倫諸邑解嚴然心媚嫉公而宋宜人卒  
官繼室張宜人操家秉稱公意三子皆有才名公益自  
負不隨俗媚上官郡守某檄取州五十金名曰無碍官  
銀公投檄地上焉有官銀而無碍者官銀有碍私銀又  
吾所無一州如斗乃公脫屣去耳執不與竟以此囿謗  
罷官睢人徐駕部紀公政曰懲一惡少而無賴斂迹去  
一猾吏而舞文縮手治一蕩子而遊惰革面嚴城門之



鑰則羣飲戢清嚴更之舍則大盜息省里甲而見年無  
再會革買辦而負販無摧直案無留牘獄無滯囚嚴明  
清敏之政父老所睹記謂爲絕倫其言皆有按據無虛  
美云公聞之曰吾誠無得罪於民吾視貴賤猶條風之  
時麗也視毀譽猶蚊蚋之過也已而伯子舉于鄉雖陳  
人相賀天之祚善乃在斯乎公日閉戶讐書時花竹容  
身而游適情而行二三知友過從話農桑及人倫善事  
時爲詩若小令酒酣以往或擁膝或曳杖而歌之今所  
存比棠集適和堂詩自成一家言張宜人舉子遂坐之  
膝偕諸昆若諸生授經程督點竄其舉子業日諄諄訓

之以孝友廉讓無以小快害道斯須害儀也其嫉惡不  
嫌面數而無藏怒人方媿憾而公已忘不省尤好周人  
之急隨所有施之不靳宋宜人佐公讀如樂羊子妻佐  
公養如桓少君姑文嚴不逢其怒繼姑陳和不忸以傲  
治生產短袂攘卷與家人同勤苦見星而起中宵而罷  
教諸子若婦如之其自奉儉貴爲大夫婦而縞衣綦巾  
敝則補垢則澣糲粢之飯藜藿之羹無改於舊教諸子  
若婦如之詳具郝按察誌中公生嘉靖壬午卒萬曆己  
亥年七十有八宋宜人生嘉靖丙戌卒萬曆庚辰年五  
十有五子四人宋宜人出者伯蓮卽我虛公婦祝贈安



人辰州府判養蒙女繼以鄒封安人倉副使士登女仲  
蓬諸生婦李復初女叔邁國子生婦郜按察使永春女  
節志宋宜人者也女二人長適胡楨子耀次適舉人段  
錦子承烈張宜人出者季遂婦張教諭文蔚女孫男七  
人伯龍乙未進士爲令爲南吏部主事今爲南戶部署  
郎中婦單舉人大章女仲龍諸生婦殷諸生炳女繼以  
王國子孫佳胤女叔龍諸生婦于諸生曰有女季龍婦  
殷嘉興府判詮女繼以耿諸生光庭女少龍舉人婦王  
諸生舉安女蓮出也見龍婦孫諸生懋賞女蓬出也附  
龍婦張舉人王鉉女邁出也孫女八人蓮出者二適諸

生李因商子長春諸生趙容光子周霖蓬出者二適國  
子生李登俊子諸生爲箕武定世子右文邁出者一適  
諸生于爾明子祚長遂出者三字國子生杜廷臚子某  
二待字曾孫男六人伯龍出者象嚴見龍出者象瑯象  
琳附龍出者象瑗聘諸生楊景和女曾孫女九人仲龍  
出者一叔龍出者三二字諸生閻應暘子弘祚舉人張  
弘道子興讓少龍出者二一字舉人王養明子之彥見  
龍出者二附龍出者一皆待字宋宜人以萬曆八年十  
有一月十有八日葬城西回回店新阡公以二十有七  
年十有一月十有五日合葬文部嘗憤鼎覆餗而國均



不平也草彈文爲黨人所窺中以計典事明稍遷民部  
亟論楚宗寃狀可謂邦之司直先祖無美而稱必不其  
然余後成公十年叅知河南分部大梁往來陳留睢陽  
間士民道公治行質諸狀不謬第惜公三事有文學而  
不得舉進士善吏事而厄讒口所爲詩歌類可傳而學  
士鮮有述者夫得一文部爲孫貽公令名長世三事何  
關公重輕哉銘曰謂孝廉必貴或不沾一命卽世而爲  
士師爲民父母踐大夫之位謂守令選擇而使必賢民  
或無得稱焉而與人之誦易地皆然豈無達官不必胡  
考而開八表菟裘佚老豈無高年不必多令嗣而子有  
孫孫有子三世濟美身親見之抑有伉儷偕之隱顯令  
始令終內助非鮮優學優仕人所能乎多壽多男天所  
不可必乎天錫公純嘏公復何憾於人矣夫

奉訓大夫王公范安人墓誌銘

海虞稱王氏爲甲族其隱而以孝聞者曰廷美其仕而  
以政績聞者曰侍御舜耕曰憲副舜漁非隱而孝儷之  
起家非科目而政績儷之者曰鹽運副使之稷廷美之  
孫舜漁之仲子也字汝立而從父石溪公號見溪以志  
永思人稱見溪公云憲副公初娶錢宜人生子之龍繼  
章宜人生公三歲失兄五歲失父父家無長物惟沮洳



田四百畝章宜人課諸傭力耕而課子舌耕絕不以蚤  
孤有姑息侍御公友于弟而篤愛猶子發憲副公遺書  
授之輒泣不自勝手澤存焉音容安在所不以此繼志  
述事者非夫也十五娶范安人治女工綜家政勤儉一  
如其姑而公得務舉子業十九爲邑諸生自視欲然此  
吾父薦鄉書之歲也而吾僅此乎無何侍御復卒公哀  
之如父居恒深念弱一介焉猶懼不支而世父忽然家  
何以堪學日益勤遂病消渴母憂之先君子不絕之緒  
如綫而兒作勞不已如遺體何謝遣其師束書度閣專  
心方藥久之病已入太學凡八試不偶廢書而嘆必一

第而後效官飯牛牧豕者非人乎詞選人以例授山東  
藩幕標鑿通晤吏牒舉日暫視究其意旨諸臺使攝肥  
城令從容持大體要在成就安全之七月而頌聲作旣  
代民遮留不得發復受檄攝長山令長山大豪田連阡  
陌以不入租爲健公曰是不可以肥城之治治也峭覈  
爲方爭昧抑絕爲置渠首于法民負輦相踵償數歲逋  
四月又受檄攝霑化令霑化濱海斥鹵寬其收事使民  
歸農兼複與單輕相伍汙萊盡墾霑化又大治學使者  
屬校士品題甲乙衆服其允而先是憲副公以少叅分  
部濟南有遺愛三邑人知爲公子世受王氏恩不可諼



爲生祠事之著靈響焉齊魯間難治縣三諸臺䟽請除  
公等爲令而所居品高見謂左官擢判貴陽府治畢節  
畢節永寧赤水烏撒四衛漢夷錯處綰轂六詔扼貴州  
亢判府與兵使坐鎮之御以恩信簡略苛細夷牽馬操  
刀奉盤錯鋌刑牲而誓不敢入界勒習卒伍稜威盛容  
懲諸世官驕惰不閒騎射而斥其尤無良者施都護險  
誠把文吏短長雷用其下莫敢誰何公刺得事有左驗  
奏記直指彈治之坐遠戍吏士歡呼已築衛城脩衛學  
益購書訓士士斌斌質有其文矣烏撒象房百楹居滇  
貢象者宣慰使安國亨狂狡于其西版築百堵奪驛道

百里公身往詰之此尺寸皆縣官物若胙土千里未饜  
而侵敗王略豈以吾輩無三尺法三尺劍乎立麾擗之  
國亨矍然泥首謝過諸夷聞之累息委命僉憲歛胡公  
卒官調棺斂傾橐爲道路費得還葬衣冠誦義三載考  
最贈父母如故秩而配范封安人尋有採木之役故事  
木直多竒羨公無所染費省而財足用渡黃河木有圍  
二丈長倍之者二忽逸而陷廡淤中千人不可出爲文  
祭之迺起復見夢曰不欲逐衆木後可別舟相送如其  
言木行如駛大司空以聞詔賜金幣擢雲南五井提舉  
未上進福建都轉運司副使而遊已倦遽致其事歸蕭



侍御以公軼才不宜置散地推轂之公謝曰令吾欲仕何自免爲值建儲大慶晉階奉訓大夫北鄉而拜

上幸不忘踈賤老臣安所爲報被服儒行以教子孫帥先間黨而已少有至性慟不及父非就家塾朝夕母所不違跬步侍疾若與之俱疾不解衣者浹辰不嘗食者累日母有不豫色長跪流涕色和而後起旣婚月一至婦室布榻母寢旁數命之退不去推母之愛及兩女兄一女弟恩禮綢繆母哭兩孫疾滋甚旦莫籲天損已年爲母壽母卒擗踊號泣逾於孺子瞿文懿見之曰古之死孝人也寢苦枕由斷酒肉之味足不出閩歲時果蔬

芻豢之屬未薦不嘗其薦也淚如綆縻而時指遺象示諸孫此毅然丈夫節槩者若王父也此閔閔然有憂生之嗟者若王母也病革命孫奉象而至慟曰今日迺得事吾親地下矣左右皆泣莫能仰視其孝儷于隱士者以此范安人憲副來賢女也母錢宜人公爲錢氏外生范公相攸而奇公以安人字之十七爲新婦姑以貴家女不習事爲虞三日姑帥之見廟嘆憲副公不及見泣下霑襟安人亦爲改容去其綺縞金玉而推布與女奴同甘苦操作姑大喜事姑如公之事母也無所不致慎公哭母眩仆安人手理含槨備物無遺憾家人千指分



職程功夙興夜寐至耄不倦愛其子而能勞飲食不溲  
衣裳不致飾課讀非中夜不休事公莊不以燕媵見公  
困公車則慰藉之既仕則常進規願君視官如家先人  
之令範可則倣也願君無家於官先人之遺業可守成  
也公之事親孝歷仕廉雖自其天性乎安人與有助矣  
中年少子夭已失長子兩孫大者財十三公召其婦來  
阿翁五歲而孤若子不幸如之子且以若爲父而家復  
災邑有大繇終不以燬廢徃役之義拮据卒瘞力不耐  
以家秉授婦族有覬覦者公聞而恚是將不利于孺子  
白譚明府其計遂奪七夕之朝若有見者曰適彼樂郊

爰得我所口誦佛號而瞑蓋公壯年好客客猥多晚屏  
居歸依釋氏云安人哭子患末疾復哭公所苦浸篤又  
三年卒公卒萬曆癸卯七月七日距生嘉靖辛卯八月  
十有三日年七十有三安人卒萬曆丙午六月二十有  
五日距生嘉靖己丑四月二十日年七十有八子二人  
女一人伯子曰約禮十七爲諸生有儁才游兩京太學  
不遇鬱伊失志卒娶郡丞陳堯女司成寰女孫也仲子  
天者曰隆禮女爲諸生張福慶婦太學希齊子郡守文  
麟孫也約禮二子伯胤忠娶錢水部時俊女侍御岱孫  
也仲顯忠聘黃太學仕女叅政時雨孫也未行而卒今



娶于譚州倅光宗孫也孫女三人一爲諸生孟方昇婦  
文學楊清子觀察中孫也一爲諸生陳耀卿婦太學斗  
樞子郡守國華孫也一爲諸生徐錫鼎婦太學待徵子  
上虞令懋德孫也兩孫髫髻壯績文受知余叔弟慟其父  
蚤世手述王父母行事數千言猶曰未悉而介叔弟請  
志于余余節而志其章章效于事者如右銘曰烏衣子  
弟斷斷龍鳳虎豹區分猗與大夫軼羣當官緯武經文  
所至吏習民殷以淨西南夷氛三寸舌爲三軍不義富  
貴浮雲委而去之訢訢終身以孺慕聞觀厥刑于女君  
克孝克慈克勤貽孫謀今陶薰念祖德兮憂愍海虞一

丘隱弁松楸佳氣氤氳史銘非虛美云令問長世蘭芬

夔州府通判何公徐孺人墓誌銘

余兒時入邑中待試則何公在諸生籍中聲隆起後進  
嚴事之垂二十年公爲陝西省幕余以叅議至遜不敢  
居公上公執禮甚恭而余不習吏事有所移文僚長押  
書體倨獨公舉相告使謝過余益服公能成人美如此  
公與余先後里居日聞其行事爲國矜式公旣没子圖  
爲狀而先之以舅氏徐觀察惟得之言使余志墓夫鄉  
先生可祭于社者公其人也因爲志曰公名器字汝玉  
其先新安海陽人也南唐時有令達者爲國子司業與



弟國師令通至宋則許州節度使彬朝奉大夫昂先輩  
明潤俱有聞傳二世爲某則公之王父若父也公生言  
貌異凡兒王母某奇之吾爲何家婦六十年屬在中葉  
其以孺子亢宗乎稍長就塾師受書一二過輒成誦又  
善屬對父與其伯父心異公使從邑大儒張元學呻其  
佔畢夜分不絕母某聞之弗善也新安十九以賈起家  
且儒孰與賈捷乃使從從兄賈景陵而公學不廢遂爲  
景陵諸生受室于徐徐故邑右姓義濱公某者諸生中  
翹楚生女而失其母愛憐之特甚才公而妻之是爲徐  
孺人孺人從兄楚陵公者卽觀察惟得之父也有人倫

鑑識公朝夕相切劘名日起試必爲諸生冠食縣官廩  
矣公益厲志于學其文以昌黎眉山爲宗詩則少陵士  
遠方行束修者日衆邑令丘公至欲執弟子禮公謝之  
已乞公授其子經客有暮夜懷金丐公居間公艴然曰  
吾抗顏而爲邑侯子師義不欲下人今乃作交關客自  
點耶邑之薦紳愈重公願納交者履錯于道而會修邑  
乘筆削倚公叅半是時公父任賈而內政付徐孺人孺  
人身與婢任織而課諸奴耕夜則並公案爨脂火理刀  
尺度公欠伸方罷未明已求衣矣客至珍羞早莫充溢  
圓方又衣食門下士貧者已遭父喪附於身若棺槨無



纖介憾母嫠居海陽不能輦以來歲時具服食器用緘  
致之凡數十年無廢缺皆孺人力也公既用久次貢春  
官尋入太學大司寇夷陵劉公爲吏部郎合試天下貢  
士拔公第四人久之除同知陳州事州人劉公爲吏部  
郎實請得之州守樵李洪公號有幹局然多倚辦公公  
明習法令所上爰書皆引繩墨切事情監司屬署長葛  
縣歲饑米石千錢公爲寬徭慮囚罷諸苛政請命于神  
一夕雨大降歡聲動四野去之日遮道車不得前三年  
遷陝西有老父以金贈曰民往者中盜而疑其鄰之父  
賴明公鄰父得脫吾因以有今日敢以爲報公笑而却

之吾不任怨亦不任德陝西方伯劉公陰公察公廉所  
委輸少府金錢數十萬緡及更定權量汰諸侵牟率用  
公議部使者露章薦公遷通判成都府後先讞獄百數  
務在平反而鑄錢之令下官民病之主者用公條上利  
害十許事錢法行而民無患亡何母卒歸新安奉父母  
合葬服竟以故官補夔州蜀有事征夷公職餉會計出  
納明允墨吏戢不得肆藩伯王公御史中丞郭公檄褒  
公甚著已攝大寧雲陽建始諸屬邑篆課丁竈權茶鹽  
民與商樂公之不擾而雲陽至生祠公語在碑中建始  
黃權爲仇家所搆逃入蠻中私以金三十斤餽公公佯



受金俟其自縛來歸而後返之所部斥堠鎧仗繕治稱  
媿爲一路最而齋厨索然先是徐孺人歲數夢所居第  
有榴數株取食之比至夔與夢合私計公祿將無盡此  
乎天定之矣而公嘗奉檄清雲陽田賦得匿賦千計直  
指宋公上公功諸不便者煽蜚語中公坐左官律當曳  
裾王門公雅倦遊徐孺人亦謂公君不以賈易儒不以  
仕易貧妾四從君宦邸黽勉左右爲清白吏卽白首青  
山不相負矣公乃上書乞長休告蜀中丞孫公固持之  
不得也歸五年念徐孺人作勞久公始問家人產而務  
爲樽節退讓口不臧否人物不侵侮不好狎甚爲鄉里

所安邑令歲以上賓禮公終其身公卒萬曆丁酉六月  
二十有九日距生正德丁卯十有二月十有一日年七  
十有九徐孺人卒萬曆己丑九月二十有六日距生嘉  
靖丁亥六月六日年六十有三公蓋傷孺人而病病九  
年卒始孺人生男子二人長曰多賢爲邑諸生娶程某  
女次曰多材娶曾某女其督教極嚴胥爲令嗣不幸蚤  
世今惟少子圖在圖亦諸生則助造者出也多材有女  
受貢士鄒某子聘亦殤兩婦誓不踐二庭遠者三十餘  
年里人有雙節之日焉孺人生女子子一人適邑諸生  
王亦湯女卒亦湯更娶有子孺人子之如巳女子孺人



之妹適於章章有子諸生中美公有猶子國字而教之  
與已子等圖娶熊某女生男子一曰凌漢女子三進士  
董公曆子某州大夫朱公高仲子萬倍之子某其婿也  
一未字孺人葬以某年某月某日公葬以卒之明年某  
月某日墓在某所銘曰漸江水出天子鄣中有何氏家  
白楊公載啓字赤帝鄉南州女士占鳳皇和鳴雍雍媯  
與姜自遠有耀世乃昌錦城雲安郡相望別駕之功海  
沂祥疇昔提攜三尺囊丹鉛竹素雲錦章不階尺寸千  
仞翔在昊在楚國用張四民士冠農工商有經安問簞  
中黃闔胡往視何公良



